

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১৭/২০১৭

ঢাকা, বুধবার ১৪ জুন ২০১৭, ৩১ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। তিন জেলায় পাহাড় ধসে সেনা সদস্যসহ শতাধিক নিহত
প্রাণহানির ঘটনায় রাষ্ট্রপতি ও প্রধানমন্ত্রীর শোক
- ২। সুইডেনের উদ্দেশে প্রধানমন্ত্রীর ঢাকা ত্যাগ
- ৩। পাহাড় ধসে ক্ষতিগ্রস্তদের সব রকম সহযোগিতা করা হবে : দুর্য়োগ ব্যবস্থাপনা ও ত্রাণমন্ত্রী
- ৪। দেশে ১৪ লাখ সরকারি কর্মকর্তা কর্মচারি : সংসদে জনপ্রশাসন মন্ত্রী
- ৫। ভূমি ধসে আহতদের চিকিৎসা নিশ্চিত করার নির্দেশ স্বাস্থ্যমন্ত্রীর
- ৬। শুধু পাঠ্যবইয়ের শিক্ষা নয় পরিপূর্ণ বিকাশের সুযোগ নিতে শিক্ষামন্ত্রীর আহ্বান
- ৭। কমিটিতে ৩৩ শতাংশ নারীর প্রতিনিধিত্ব বিষয়ে জানতে চায় নির্বাচন কমিশন : ৪০ দলকে চিঠি
- ৮। নিউইয়র্কে বাংলাদেশের কূটনীতিক গ্রেফতার : ঢাকায় যুক্তরাষ্ট্রের দূতকে তলব
- ৯। ইভটিজিং প্রতিরোধে প্রতিটি বিদ্যালয়ে অভিযোগ বাক্স রাখার সিদ্ধান্ত
- ১০। আম রপ্তানিতে জটিলতা
- ১১। ফিরে এসেছে বিলুপ্তপ্রায় ২২ প্রজাতির মাছ : মৎস্য ও প্রাণিসম্পদমন্ত্রী
- ১২। আবগারি শুল্ক সংশোধনের ইঙ্গিত অর্থ প্রতিমন্ত্রীর

১। তিন জেলায় পাহাড় ধসে সেনা সদস্যসহ শতাধিক নিহত
প্রাণহানির ঘটনায় রাষ্ট্রপতি ও প্রধানমন্ত্রীর শোক

গত কয়েক দিনের টানা বর্ষণের ফলে সৃষ্ট পাহাড় ধসে চট্টগ্রাম বিভাগের তিন জেলায় সেনা সদস্যসহ শতাধিক মানুষের মৃত্যু হয়েছে। রাঙ্গামাটি, চট্টগ্রাম ও বান্দরবানে এই ঘটনায় সর্বশেষ খবর পাওয়া পর্যন্ত ১২৩ জন নিহত ও আরো শতাধিক লোক আহত হয়েছেন। এর মধ্যে রাঙ্গামাটিতে সেনা কর্মকর্তাসহ ৮৮ জন, চট্টগ্রামে ২৯ জন এবং বান্দরবানে ৬ জন মারা গেছেন। মৃতের সংখ্যা আরো বাড়তে পারে বলে আশঙ্কা করা হচ্ছে। তিন জেলায় প্রবল বর্ষণে পাহাড় ধসে সেনা সদস্যসহ সাধারণ মানুষের মৃত্যুর ঘটনায় গভীর শোক প্রকাশ করেছেন রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা। একই সঙ্গে উদ্ধার কাজ দ্রুত শেষ এবং আহতদের চিকিৎসার ব্যবস্থা করতে সংশ্লিষ্টদের নির্দেশ দেন তারা। গতকাল পৃথক শোকবার্তায় রাষ্ট্রপতি ও প্রধানমন্ত্রী এ নির্দেশ দেন। **ইত্তেফাক**, **সংবাদ**, **প্রথম আলো**, **ডেইলি সান**, **এশিয়ান এজ**, **অবজারভার**, **ডেইলি স্টার**, **নিউ নেশনসহ** অধিকাংশ পত্রিকা এ বিষয়ে লিড নিউজ ছেপেছে।

২। সুইডেনের উদ্দেশে প্রধানমন্ত্রীর ঢাকা ত্যাগ

প্রধানমন্ত্রী শেখ হাসিনা তিন দিনের সরকারি সফরে সুইডেনের উদ্দেশে গতকাল মঙ্গলবার ঢাকা ত্যাগ করেছেন। সুইডেনের প্রধানমন্ত্রী স্টিফেন লোফভেনের আমন্ত্রণে তিনি এই সফরে যাচ্ছেন। প্রধানমন্ত্রী লন্ডনে ২৪ ঘন্টা যাত্রাবিরতি করবেন। শেখ হাসিনা আজ বুধবার বিকালে স্ক্যান্ডিনেভিয়ান এয়ারলাইন্সের একটি ফ্লাইটে স্টকহোমের উদ্দেশে লন্ডন ত্যাগ করবেন। রাত ৯টা ৪০ মিনিটে স্টকহোমের অরিয়ান্দা বিমানবন্দরে ফ্লাইটটি অবতরণের কথা রয়েছে। প্রধানমন্ত্রী ৪৭ সদস্যের ব্যবসায়ী প্রতিনিধিসহ একটি উচ্চ পর্যায়ের প্রতিনিধিদলের নেতৃত্ব দিচ্ছেন। ১৫ জুন সেখানে সুইডিশ প্রধানমন্ত্রীর সঙ্গে তিনি বৈঠক করবেন। প্রধানমন্ত্রী সুইডিশ পার্লামেন্ট পরিদর্শন করবেন এবং ভারপ্রাপ্ত স্পিকার তোবিয়াস বিলসট্রোমের সঙ্গে বৈঠক করবেন। আনুষ্ঠানিক বৈঠকের প্রাক্কালে তিনি রয়্যাল ক্যাসলে সুইডিশ রাজা ষোড়শ কার্লের সঙ্গে সাক্ষাৎ করবেন। প্রধানমন্ত্রী ১৫ জুন প্রবাসী বাংলাদেশিদের সংবর্ধনায় এবং ১৬ জুন বাংলাদেশ-সুইডেন বিজনেস এন্ড ইনভেস্টমেন্ট ফোরামের বৈঠকে যোগ দেবেন। সূত্র-**ইত্তেফাক** (শেষ পৃ.,ক.৮), **প্রথম আলো** (পৃ.২,ক.৮), **নিউ এজ** (শেষ পৃ.,ক.৮), **ডেইলি সান** (শেষ পৃ.,ক.১)।

৩। পাহাড় ধসে ক্ষতিগ্রস্তদের সব রকম সহযোগিতা করা হবে : দুর্যোগ ব্যবস্থাপনা ও ত্রাণমন্ত্রী

দুর্যোগ ব্যবস্থাপনা ও ত্রাণমন্ত্রী মোফাজ্জল হোসেন চৌধুরী মায়া বলেছেন, পাহাড় ধসে আহতদের চিকিৎসা এবং ক্ষতিগ্রস্তদের প্রয়োজনীয় সব ধরনের সহযোগিতা করা হবে। খাদ্যের কোনো অভাব নেই। সাহায্য করতেও কোনো কৃপণতা নেই। যখন যা প্রয়োজন হবে আমরা তা দিতে সক্ষম আছি। সচিবালয়ে গতকাল এক সংবাদ সম্মেলনে তিনি এসব কথা বলেন। আজ বুধবার সকালে দুর্যোগ ব্যবস্থাপনা ও ত্রাণ মন্ত্রণালয়ের মন্ত্রী সচিবসহ উর্ধ্বতন কর্মকর্তারা ঘটনাস্থলে যাবেন বলে সংবাদ সম্মেলনে জানানো হয়। সূত্র-**ভোরের কাগজ** (পৃ.১,ক.৫), **ইনকিলাব** (পৃ.১,ক.৫)।

৪। দেশে ১৪ লাখ সরকারি কর্মকর্তা কর্মচারি : সংসদে জনপ্রশাসন মন্ত্রী

দেশে বর্তমানে মোট ১৩ লাখ ৮২ হাজার ৩৯৩ জন সরকারি কর্মকর্তা-কর্মচারি রয়েছেন। যার মধ্যে ১ম থেকে ৯ম গ্রেড পর্যন্ত প্রথম শ্রেণির পদ রয়েছে ১ লাখ ৪৮ হাজার ৮১৯ টি। গতকাল জাতীয় সংসদে টেবিলে উত্থাপিত প্রশ্নোত্তর পরে এক প্রশ্নের জবাবে এ তথ্য জানান জনপ্রশাসনমন্ত্রী সৈয়দ আশরাফুল ইসলাম। এছাড়া জনপ্রশাসনে বর্তমানে চুক্তিভিত্তিক নিয়োগকৃত কর্মকর্তার সংখ্যা ২৬৫ জন। অপর এক প্রশ্নের জবাবে বিভিন্ন মন্ত্রণালয়ে বর্তমানে তিন লাখ ২৮ হাজার ৩১১টি পদ শূন্য রয়েছে বলে মন্ত্রী জানান। শূন্য পদে নিয়োগ দেওয়ার প্রয়োজনীয় পদক্ষেপ নেওয়া হয়েছে জানিয়ে মন্ত্রী বলেন, শূন্য পদ পূরণ চলমান প্রক্রিয়া। সূত্র-**জনকণ্ঠ** (পৃ.২,ক.৬), **সংবাদ** (পৃ.১,ক.৬), **নিউ এজ** (শেষ পৃ.,ক.১), **ডেইলি সান** (শেষ পৃ.,ক.৭)।

৫। ভূমি ধসে আহতদের চিকিৎসা নিশ্চিত করার নির্দেশ স্বাস্থ্যমন্ত্রীর

চট্টগ্রাম ও তিন পার্বত্য জেলার সব হাসপাতাল এবং চিকিৎসকদের ভূমি ধসে আহতদের দ্রুত জরুরী চিকিৎসা নিশ্চিত করতে ২৪ ঘন্টা তৎপর থাকার নির্দেশ দিয়েছেন স্বাস্থ্যমন্ত্রী মোহাম্মদ নাসিম। চট্টগ্রাম বিভাগের পরিচালকসহ সিভিল সার্জনদের সার্বক্ষণিক সতর্ক থাকারও নির্দেশ দেন তিনি। স্বাস্থ্যমন্ত্রী গতকাল এক বিবৃতিতে পাহাড় ধসে সেনাসদস্যসহ সাধারণ মানুষের মৃত্যুর ঘটনায় গভীর শোক প্রকাশ করে স্বজনদের প্রতি আন্তরিক সহানুভূতি জানান। সূত্র-জনকণ্ঠ (শেষ পৃ.ক.৭), ইত্তেফাক (পৃ.১৯,ক.১)।

৬। শুধু পাঠ্যবইয়ের শিক্ষা নয় পরিপূর্ণ বিকাশের সুযোগ নিতে শিক্ষামন্ত্রীর আহ্বান

শুধু পাঠ্যবইয়ের শিক্ষায় নিজেদের সীমাবদ্ধ না রেখে পরিপূর্ণ বিকাশের সুযোগ নিতে শিক্ষার্থীদের প্রতি আহ্বান জানিয়েছেন শিক্ষামন্ত্রী নুরুল ইসলাম নাহিদ। তিনি বলেন, শিক্ষার লক্ষ্য হচ্ছে পড়ার অগ্রহ ও মেধা বিকাশের সুযোগ তৈরি করা এবং নিজের শক্তিকে কাজে লাগানোর চেষ্টা করা। আমরা শিক্ষাকে একটি সৃজনশীল ধারায় নিয়ে যাওয়ার চেষ্টা করছি। এজন্য শিক্ষকদের পাঠদানের কৌশল, শ্রেণীকক্ষের পরিবেশ বদলাতে হবে। গতকাল রাজধানীর ওসমানী স্মৃতি মিলনায়তনে সৃজনশীল মেধা অন্বেষণ প্রতিযোগিতায় বিজয়ীদের পুরস্কার বিতরণী অনুষ্ঠানে তিনি একথা বলেন। দেশব্যাপী ৬ষ্ঠ থেকে দ্বাদশ শ্রেণি পর্যন্ত শিক্ষার্থীদের মধ্যে নির্বাচিত সেরা মেধাবীদের এই পুরস্কার বিতরণ করা হয়। সূত্র-ইনকিলাব (পৃ.১,ক.৮), সংবাদ (পৃ.৪,ক.১), বাংলাদেশ টুডে (পৃ.৩,ক.৫), অবজারভার (পৃ.১০,ক.২)।

৭। কমিটিতে ৩৩ শতাংশ নারীর প্রতিনিধিত্ব বিষয়ে জানতে চায় নির্বাচন কমিশন : ৪০ দলকে চিঠি

রাজনৈতিক দলের সব পর্যায়ের কমিটিতে অন্তত ৩৩ শতাংশ নারীর প্রতিনিধিত্বের বিষয়ে অগ্রগতির তথ্য আগামী ১৩ জুলাইয়ের মধ্যে নির্বাচন কমিশনকে জানাতে হবে নিবন্ধিত রাজনৈতিক দলগুলোকে। একথা জানিয়ে দেশের ৪০টি রাজনৈতিক দলকে চিঠি দিয়েছে কমিশন। এছাড়া ৩১ জুলাইয়ের মধ্যে দলগুলোর ২০১৬ সালের আয়-ব্যয়ের হিসাব জমা দিতেও চিঠি দেওয়া হয়েছে। গতকাল নিবন্ধিত রাজনৈতিক দলগুলোর মহাসচিব/সাধারণ সম্পাদকের কাছে এ সংক্রান্ত চিঠি পাঠানো হয়েছে। সূত্র-সংবাদ (শেষ পৃ.,ক.১)।

৮। নিউইয়র্কে বাংলাদেশের কূটনীতিক গ্রেফতার : ঢাকায় যুক্তরাষ্ট্রের দূতকে তলব

শ্রমিক পাচার এবং গৃহকর্মীকে নির্যাতন ও ভয় দেখিয়ে বিনা বেতনে কাজ করানোর অভিযোগে নিউইয়র্কে বাংলাদেশের উপ-কনসাল জেনারেল মো. শাহেদুল ইসলামকে পুলিশ তাঁর বাসা থেকে গ্রেফতার করেছে। স্থানীয় সময় সোমবার গ্রেফতারের কয়েক ঘন্টা পর তাঁকে কুইন্সের আদালতে হাজির করা হয়। এদিকে নিউইয়র্কে মো. শাহেদুল ইসলামকে আটকের ঘটনায় ঢাকায় যুক্তরাষ্ট্রের চার্জ দ্য অ্যাফেয়ার্স জোয়েল রিফম্যানকে গতকাল পররাষ্ট্র মন্ত্রণালয়ে তলব করে অসন্তোষ প্রকাশ করা হয়। সূত্র-প্রথম আলো (শেষ পৃ.,ক.২), জনকণ্ঠ (শেষ পৃ.,ক.২), নিউ এজ (শেষ পৃ.১,ক.৮), ডেইলি সান (পৃ.১,ক.৬)।

৯। ইভটিজিং প্রতিরোধে প্রতিটি বিদ্যালয়ে অভিযোগ বাক্স রাখার সিদ্ধান্ত

ইভটিজিং প্রতিরোধে প্রতিটি বিদ্যালয়ে অভিযোগ বাক্স রাখার সিদ্ধান্ত নিয়েছে সরকার। যেখানে প্রতিটি অভিযোগকারী তাদের অভিযোগগুলো চিঠি আকারে বাক্সে জমা রাখবে। সেগুলো আমলে নিয়ে সরকার ইভটিজারদের বিরুদ্ধে কঠোর ব্যবস্থা নেবে বলে জানিয়েছেন মহিলা ও শিশুবিষয়ক প্রতিমন্ত্রী মেহের আফরোজ চুমকি। গতকাল জাতীয় প্রেসক্লাবের সামনে ইভটিজিং প্রতিরোধ দিবস উপলক্ষে এক মানববন্ধনে তিনি এ কথা বলেন। সূত্র-জনকণ্ঠ (শেষ পৃ. ক. ১)।

১০। আম রঙানিতে জটিলতা

ইউরোপে আম রঙানি নিয়ে রীতিমতো বিপাকে পড়েছেন চাষিরা। বিষমুক্ত হলেও কোয়ারেন্টাইন পরীক্ষার সময় একটু দাগ থাকলেই সেই আম আর নেওয়া হচ্ছে না বলে অভিযোগ পাওয়া গেছে। এমনিতেই এবার নির্ধারিত সময়ের পরে চাষিদের কাছ থেকে আম নেওয়া হয়েছে। দামও গতবারের তুলনায় কমেছে। ফলে আম নিয়ে উদ্বেগ ও উৎকণ্ঠায় দিন কাটাচ্ছেন চাষিরা। এ অবস্থায় গত ১২ জুন সোমবার থেকে রঙানিকারকদের আম দেওয়া বন্ধের সিদ্ধান্ত নিয়েছেন চাষিরা। সূত্র-ইত্তেফাক (শেষ পৃ.,ক.২), জনকণ্ঠ (পৃ.১৮,ক.৭),

১১। ফিরে এসেছে বিলুপ্তপ্রায় ২২ প্রজাতির মাছ : মৎস্য ও প্রাণিসম্পদমন্ত্রী

বাংলাদেশের জলাশয় থেকে বিলুপ্তপ্রায় ২২ প্রজাতির মিঠাপানির মাছ পুনরায় ফিরে এসেছে। বিভিন্ন নদ-নদী ও অভ্যন্তরীণ মুক্ত জলাশয়ে গড়ে তোলা অভয়াশ্রমেই মূলত এসব হারিয়ে যাওয়া মাছের পুনরাবির্ভাব ঘটেছে বলে জানিয়েছেন মৎস্য ও প্রাণিসম্পদমন্ত্রী মোহাম্মদ ছায়েদুল হক। গতকাল সংসদে এক প্রশ্নের জবাবে তিনি এই ইতিবাচক তথ্য দেন। সূত্র-যায়যায়দিন (শেষ পৃ, ক. ৬), নয়াদিগন্ত (পৃ.৩,ক.৫), ডেইলি সান (শেষ পৃ.,ক.৩), নিউ এজ (পৃ.১১,ক.১)।

১২। আবগারি শুল্ক সংশোধনের ইঙ্গিত অর্থ প্রতিমন্ত্রীর

প্রস্তাবিত বাজেটে ব্যাংক হিসাবে বাড়তি আবগারি শুল্ক প্রত্যাহারসহ অন্যান্য কর পুনর্বিবেচনার দাবি জানিয়েছেন সরকারি ও বিরোধী দলের সংসদ সদস্যরা। তাদের এমন বক্তব্যের পরিপ্রেক্ষিতে আবগারি শুল্ক সংশোধনের ইঙ্গিত দিয়েছেন অর্থ প্রতিমন্ত্রী এম এ মান্নান। গতকাল জাতীয় সংসদে চলমান বাজেট আলোচনায় এসব বিষয় উঠে আসে। সূত্র-যুগান্তর (পৃ.১,ক.৬), নিউ এজ (পৃ.১,ক.৩), এশিয়ান এজ (পৃ.১১,ক.১), ডেইলি সান (শেষ পৃ.,ক.৬)।

সম্পাদকীয়

- ক. **ইত্তেফাক** : দৌলতদিয়া-কুষ্টিয়া আঞ্চলিক মহাসড়কের বেহাল দশা গত দুই বৎসরের বেশি সময় ধরে বিরাজ করায় উদ্বেগ প্রকাশ করে দ্রুত রাস্তাটি সংস্কারের জন্য কার্যকর পদক্ষেপ নেওয়ার সুপারিশ।
- খ. **সংবাদ, প্রথম আলো** : গত ৬ মাসে অভিযুক্ত ১৪৮ জঙ্গি জামিনে মুক্ত হয়েছে উল্লেখ করে এসব জঙ্গি যাতে কোনো নাশকতা ঘটাতে না পারে সেজন্য তাদের কঠোর নজরদারিতে রাখার ওপর গুরুত্বারোপ।
- গ. **জনকণ্ঠ** : ঝাঁকিপূর্ণ শিশুশ্রম বন্ধে কঠোর পদক্ষেপ নেওয়ার দাবি।
- ঘ. **সমকাল, যায়যায়দিন** : ঢাকা ও চট্টগ্রামের জলাবদ্ধতা নিরসনে কর্তৃপক্ষ দূরদৃষ্টি ও দায়িত্বশীলতার পরিচয় দিবে বলে প্রত্যাশা ব্যক্ত।
- ঙ. **ইনকিলাব** : ঈদে ঘরে ফেরা মানুষের যাত্রা নিরাপদ ও নির্বিঘ্ন করতে হাইওয়ে পুলিশ ও স্থানীয় প্রশাসনকে বাড়তি উদ্যোগ গ্রহণ ও নজরদারি জোরদার করার আহ্বান।
- চ. **ডেইলি স্টার** : সাভারের হেমায়েতপুরে ঢাকা-আরিচা মহাসড়কের পাশে ময়লা-আবর্জনা ফেলার স্থানে ময়লার বিশাল স্তুপ জমে থাকায় তা জনদুর্ভোগের কারণ হয়েছে উল্লেখ করে অবিলম্বে এ ব্যাপারে কার্যকর পদক্ষেপ কামনা।
- ছ. **ইন্ডিপেন্ডেন্ট** : চিকুনগুনিয়া প্রতিরোধে মশা নিধনে প্রয়োজনীয় পদক্ষেপ নেওয়ার ওপর গুরুত্বারোপ করে সম্পাদকীয় প্রকাশ করেছে।

উপ-সম্পাদকীয়

যায়যায়দিন পত্রিকায় প্রকাশিত কলামে উল্লেখ করা হয়েছে, সব ধরনের রাজনৈতিক বিভেদ ভুলে আগামী নির্বাচনের ব্যাপারে দেশের প্রধান দুটি দলকে ঐকমত্য পোষণ করে বা সমঝোতায় এসে পরবর্তী কর্মপন্থা ঠিক করার ওপর গুরুত্বারোপ করতে হবে।

নিবন্ধ ও ফিচার

সংবাদ পত্রিকায় প্রকাশিত ‘গাছ প্রকৃতির রক্ষাকবচ’ শিরোনামের নিবন্ধে অভিমত প্রকাশ করা হয়েছে, প্রাকৃতিক বিপর্যয় থেকে বাঁচিয়ে পরিবেশের ভারসাম্য রক্ষা করতে দেশে অধিকতর বনাঞ্চল সৃষ্টি করা অত্যাবশ্যিক।

#

ফাহিমা/মরজিনা/সাদ্দা/রশীদ/তানিয়া/২০১৭/৯.০০ ঘণ্টা

